

32-modda. Reeksport bojxona rejimi

Reeksport bojxona rejimi shunday rejimki, bunda bojxona hududiga ilgari olib kirilgan tovar yoxud bojxona hududida qayta ishlash bojxona rejimiga joylashtirilgan tovarni qayta ishlash mahsuloti bojxona hududidan bojxona bojlari va soliqlar to‘lanmagan, tovarga nisbatan iqtisodiy siyosat choralari qo‘llanilmagan holda, ushbu Kodeksning [35-moddasida](#) nazarda tutilgan hollarda esa, uni olib kirishda to‘langan bojxona bojlari va soliqlar summalari qaytarilgan holda olib chiqiladi.

Tovarni reeksport bojxona rejimiga joylashtirish bojxona organi tomonidan ushbu Kodeks [21-bobining](#) qoidalariga muvofiq beriladigan ruxsatnoma asosida amalga oshiriladi.

Bojxona hududida qayta ishlash bojxona rejimida yoki vaqtincha olib kirish bojxona rejimida turgan tovarlarni reeksport qilish tovarni reeksport bojxona rejimiga joylashtirishga ruxsatnoma olinmagan holda amalga oshiriladi.

(32-moddaning uchinchi qismi O‘zbekiston Respublikasining 2018-yil 26-iyuldagi O‘RQ-488-sonli [Qonuni](#) tahririda — Qonun hujjatlari ma’lumotlari milliy bazasi, 27.07.2018-y., 03/18/488/1579-son)

Reeksport bojxona rejimiga joylashtirilgan tovarlarni bojxona hududidan amalda olib chiqish bojxona deklaratsiyasi qabul qilingan kundan e’tiboran olti oydan kechiktirmay amalga oshiriladi.

33-modda. Tovarni reeksport bojxona rejimiga joylashtirish talablari va shartlari

Tovar yoki uni qayta ishlash mahsuloti bojxona organi identifikatsiya qila oladigan taqdirdagina tovar reeksport qilinishiga yo‘l qo‘yiladi, bundan ushbu Kodeks 74-moddasining [uchinchi qismida](#) nazarda tutilgan hollar mustasno.

Avariya yoki yengib bo‘lmas kuch ta’siri oqibatida shikastlangan yoki buzilgan tovarning reeksportiga yo‘l qo‘yiladi, bunday holat vakolatli organ tomonidan tasdiqlangan bo‘lishi lozim.

Ilgari erkin muomalaga chiqarish (import) bojxona rejimiga joylashtirilgan tovarni reeksport bojxona rejimiga joylashtirishga ayni bir vaqtning o‘zida quyidagi talablar va shartlarga rioya etilgan taqdirda yo‘l qo‘yiladi:

kontrakt (shartnoma, kelishuv) shartlari bajarilmagan bo‘lsa;

tovar bojxona hududida ishlatilmagan va ta’mirlanmagan bo‘lsa, bundan tovarni qaytarishga sabab bo‘lgan nuqsonlarni yoki boshqa holatlarni aniqlash uchun tovardan foydalanish zarur bo‘lgan hollar mustasno;

tovar o‘zgarmagan holatda turgan bo‘lsa, bundan uning nuqsonlari aniqlangan hollar mustasno.

34-modda. Tovarni reeksport bojxona rejimiga joylashtirish uchun zarur bo‘ladigan hujjatlar

Tovarni reeksport bojxona rejimiga joylashtirish uchun deklarant bojxona organiga bojxona yuk deklaratsiyasini va tovarning kuzatuv hujjatlarini taqdim etadi.

Ruxsat etish xususiyatiga ega tegishli hujjatlar bo‘lgan taqdirda reeksporti amalga oshiriladigan tovarlarga nisbatan

bojxona organlarining axborot tizimida bunday hujjatlarning mavjudligini bojxona organi mustaqil ravishda tekshiradi.

35-modda. Reeksport bojxona rejimida bojxona to'lovlarining qo'llanilishi

Reeksport bojxona rejimiga joylashtiriladigan tovar bojxona bojlari va soliqlar to'lashdan ozod etiladi.

Ilgari erkin muomalaga chiqarish (import) bojxona rejimiga joylashtirilgan tovar reeksport qilinayotganda, tovarning amalda reeksport qilinayotgan qismiga nisbatan to'langan bojxona bojlari va soliqlar summalarini qaytarish ushbu Kodeksning [49-bobida](#) nazarda tutilgan tartibda, ayni bir vaqtning o'zida quyidagi talablar va shartlarga rioya etilgan taqdirda amalga oshiriladi:

tovarning reeksporti uni erkin muomalaga chiqarish (import) bojxona rejimiga joylashtirish ma'lum qilingan kundan e'tiboran ikki yil ichida amalga oshirilayotgan bo'lsa;

tovar bojxona hududida ishlatilmagan va ta'mirlanmagan bo'lsa, bundan tovarni qaytarishga sabab bo'lgan nuqsonlarni yoki boshqa holatlarni aniqlash uchun tovarni ishlatish zarur bo'lgan hollar mustasno.

Tovarni amalda olib chiqish ushbu Kodeksning [32-moddasida](#) ko'rsatilgan muddatda amalga oshirilmagan taqdirda, mazkur tovar erkin muomalaga chiqarish (import) bojxona rejimiga joylashtirilgandagi kabi bojxona bojlari va soliqlar to'lanadi.

